



Ein cyf/Our ref VG/0093/23

Paul Davies AS  
Cadeirydd  
Pwyllgor yr Economi, Masnach a Materion Gwledig

[SeneddEconomi@senedd.cymru](mailto:SeneddEconomi@senedd.cymru)

27 Mawrth 2023

Annwyl Paul,

Diolch ichi am eich llythyr dyddiedig 8 Mai ac am sylw parhaus y Pwyllgor i oblygiadau Bil Cyfraith yr UE a Ddargedwir (Dirymu a Diwygio).

Cyn ateb y pwyntiau manwl rydych chi wedi'u nodi, gallai fod yn ddefnyddiol nodi'r cyd-destun heriol y mae Llywodraeth Cymru yn gweithredu ynddo mewn perthynas â'r Bil, fel yr esboniodd y Cwnsler Cyffredinol a Gweinidog y Cyfansoddiad yn ei lythyr dyddiedig 19 Ionawr at Gadeirydd y Pwyllgor Deddfwriaeth, Cyfiawnder a'r Cyfansoddiad.

Yn gyntaf, mae Llywodraeth Cymru yn gryf yn erbyn holl fwrriad y Bil. Yn gyffredinol, ein safbwynt ni yw bod cyfraith yr UE a ddargedwir (REUL), fel cyfraith yr UE cyn hynny, yn gweithio'n dda. Felly, ac eithrio diwygio'r gyfraith yn raddol fel sy'n briodol drwy gasglu tystiolaeth, ymgynghori â'r cyhoedd, a chwblhau trefniadau craffu deddfwriaethol yn y ffordd arferol, dros amser fel sy'n wir gydag unrhyw gorff o gyfreithiau, nid oeddem yn bwriadu diddymu, dirymu na diwygio cyfraith yr UE a ddargedwir erbyn terfyn amser mympwyol am resymau ideolegol. Fodd bynnag, mae cynnig deddfwriaeth fel hon a fyddai, yn anochel, yn diddymu mesurau diogelu economaidd, cymdeithasol ac amgylcheddol hanfodol yn annerbyniol ac yn anghyfrifol. Mae hyn yn arbennig o wir o ystyried y defnydd o amser gwerthfawr gan Lywodraethau a deddfwrfeydd pan mai canlyniad rhan helaeth o'r gwaith hwn yn syml fydd cadw yn y gyfraith y darpariaethau hanfodol hynny y byddai'r Bil yn eu dileu'n awtomatig fel arall. Ni fydd y gwaith ofer hwn o unrhyw fudd i neb, ac mae'n ddefnydd anffodus o adnoddau cyfyngedig yn Llywodraeth Cymru a Llywodraeth y DU, o ganlyniad i'r penderfyniadau a wnaed gan Weinidogion Llywodraeth y DU.

Canolfan Cyswllt Cyntaf / First Point of Contact Centre:  
0300 0604400

Bae Caerdydd • Cardiff Bay  
Caerdydd • Cardiff  
CF99 1SN

[Gohebiaeth.Vaughan.Gething@llyw.cymru](mailto:Gohebiaeth.Vaughan.Gething@llyw.cymru)  
[Correspondence.Vaughan.Gething@gov.wales](mailto:Correspondence.Vaughan.Gething@gov.wales)

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Yn ail, mae'r Bil yn ei hanfod yn Fil galluogi a bydd ei oblygiadau llawn yn cael eu dylanwadu gan ddewisiadau polisi Gweinidogion Llywodraeth y DU ynghylch pa ddarnau o ddeddfwriaeth y dylid eu cadw, eu diwygio, neu eu gadael i fachlud haul. Oni bai a hyd nes y darperir y wybodaeth fanwl honno, rydym i gyd yn gweithio mewn sefyllfa ansicr iawn, gyda'r trafferthion mynychu amlwg sy'n achosi Llywodraeth Cymru, ac i'ch Pwyllgor mewn rôl graffu. Gobeithio y gallwn barhau i gydweithio wrth ymdrin â'r Bil hwn yn yr amgylchiadau anffodus hyn, gan gydnabod ein rolau sefydliadol neilltuol ond hefyd diddordebau cyffredin mewn perthynas â chyfanrwydd y setliad datganoli.

Mae'r atebion i'ch cwestiynau (mewn italig) wedi'u nodi isod.

*...a fyddech cystal â darparu'r canlynol i'r Pwyllgor:*

▪ *Eich barn ar effaith y Bil ar y sectorau uchod ac unrhyw feysydd eraill y credwch y gallai fod o ddiddordeb i'r Pwyllgor;*

Fel y nodwyd uchod, mae'r effaith ar bob sector yn dibynnu'n bennaf ar y penderfyniadau a wneir gan Weinidogion y DU i gadw'r darpariaethau REUL presennol ai peidio. Byddai'r effaith hon yn negyddol iawn, yn yr achos mwyaf eithafol, pe caniateid i'r holl REUL presennol ddo i ben ym mis Rhagfyr 2023. Fodd bynnag, rydym yn disgwyl gwybodaeth fanwl gan Lywodraeth y DU am ei bwriadau.

▪ *Rhestr o Gyfraith yr UE a Ddargedwir (REUL) berthnasol a wnaed gan Weinidogion Cymru o fewn eich cylchoedd gwaith;*

Rydym yn datblygu rhestr o REUL a wnaed yng Nghymru, a byddwn yn darparu hon pan fyddwn mewn sefyllfa i wneud hynny.

▪ *Eich cynlluniau i ddefnyddio pwerau'r Bil mewn perthynas â safonau o fewn cylch gwaith y Pwyllgor hwn, fel lles anifeiliaid;*

Fel yr eglurwyd uchod, mae cyfraith yr UE a ddargedwir yn gweithio'n dda at ei gilydd. Rydym yn dymuno gweld y safonau presennol yn cael eu cynnal ym mhob maes sydd o fewn ein cylch gwaith, gan gynnwys lles anifeiliaid, ac nid oes gennym gynlluniau i ddefnyddio unrhyw bwerau o'r fath i newid safonau.

▪ *Gwybodaeth am ba drafodaethau yr ydych wedi'u cael gyda llywodraethau eraill yn y DU ynghylch effaith y Bil ar faterion o fewn cylch gwaith y Pwyllgor, a ph'un ai/sut y gellid cydgysylltu unrhyw newidiadau i REUL perthnasol, os caiff y Bil ei basio;*

Mae Llywodraeth Cymru wedi nodi'n glir iawn ar lefel Weinidogol, ac ar sawl achlysur, ein pryderon sylfaenol ynghylch natur ac amseriad y Bil. Rydym hefyd yn cael sgwrsiau rheolaidd â Llywodraeth y DU, Llywodraeth yr Alban a Gwasanaeth Sifil Gogledd Iwerddon ar lefel swyddogion. Rydym wedi dweud yn glir wrth Lywodraeth y DU yn y trafodaethau hyn fod budd sylweddol mewn rhannu gwybodaeth ymlaen llaw am ei bwriadau, ac mewn cydweithio gwirioneddol ar gynigion sy'n ymwneud â REUL.

▪ *Manylion am unrhyw effaith ar gynlluniau deddfwriaethol Llywodraeth Cymru pan fo'n berthnasol i gylch gwaith y Pwyllgor;*

Byddwn yn parhau i rannu gwybodaeth am y Bil wrth iddo fod ar gael. Rydym yn agored i gael trafodaethau rhagarweiniol yn gyfrinachol ynghylch goblygiadau posibl i fusnes y Senedd.

▪ *Eich barn ar sut y gallai'r Bil ryngweithio â chytundebau masnach ryngwladol ar ôl Brexit;*

Unwaith eto, bydd yr ateb gorau i hyn yn dibynnu ar ba ddarnau o REUL mae Llywodraeth y DU yn penderfynu eu dirymu, neu ganiatáu iddynt ddirwyn i ben, neu eu diwygio. Yn gyffredinol, nid ydym yn disgwyl y bydd effaith sylweddol yn y maes hwn, ond ni allwn fod yn sicr eto. Rydym yn disgwyl i Lywodraeth y DU beidio â chael gwared ar ddarnau o REUL sy'n hanfodol i'w rhwymedigaethau o dan unrhyw gytundebau masnach rydd, neu o dan Gytundeb Masnach a Chydweithredu yr UE a'r DU.

▪ *Eich barn ar effaith bosibl y Bil ar fasnach o fewn y DU, gan gynnwys sut y caiff ei weithredu ochr yn ochr â Deddf y Farchnad Fewnol 2020;*

Fel uchod, nid yw'r Bil yn ddo'i hun, o reidrwydd, yn cael unrhyw effaith uniongyrchol ar fasnach o fewn y DU. Bydd unrhyw effaith yn dibynnu ar ba ddarnau o REUL sy'n cael eu diweddu neu eu newid. Nid ydym yn derbyn bod Deddf Marchnad Fewnol y DU yn llesteirio mewn unrhyw ffordd hawl y Senedd i ddeddfu ar faterion sydd o fewn ei chymhwysedd.

▪ *Eich barn ar sut y gallai'r Bil ryngweithio â fframweithiau cyffredin o fewn cylch gwaith y Pwyllgor hwn.*

Unwaith eto, mae'n rhy gynnar i bennu'r effaith hon. Mae meysydd polisi lle dylai bodolaeth fframweithiau cyffredin gynorthwyo â'r materion a'r penderfyniadau sy'n ymwneud ag unrhyw newidiadau sylweddol i ddarnau o REUL.

*Bwyd a diod:*

• *Diogelwch bwyd – Mae'r Asiantaeth Safonau Bwyd (ASB) yn nodi eu bod yn gyfrifol am dros 150 o ddarnau o REUL ar ddiogelwch bwyd yng Nghymru a Lloegr, ynghyd â 39 o ddarnau ychwanegol yng Nghymru, lle mae ganddi gyfrifoldebau ehangach. Mae'r ASB yn nodi "rydym yn glir na allwn ddirwyn i ben y deddfau ar ddiogelwch a dilysrwydd bwyd heb beri dirywiad yn safonau bwyd y DU a risg sylweddol i iechyd y cyhoedd."*

Rydym yn cytuno. Nid yw'n hysbys eto sut mae Llywodraeth y DU yn bwriadu bwrw ymlaen yn y maes hwn.

• *Ymwahanu – mae'r Ffederasiwn Bwyd a Diod yn datgan bod gan hyn y potensial i ysgogi ymwahanu sylweddol os na chaiff newidiadau eu cysoni ar sail y DU a byddai hyn wedyn yn rhoi beichiau ychwanegol ar fusnesau Cymru, yn enwedig mentrau llai.*

Rydym yn credu bod angen i Lywodraeth y DU ymgysylltu'n llawn â'r llywodraethau datganoledig i ystyried yr holl faterion i ddiwydiant sy'n deillio o unrhyw newid arfaethedig mewn safonau, ac ystyried sut gellir rheoli hyn orau o fewn y setliadau datganoli. Fel yr amlinellir uchod, yn gyffredinol credwn fod cyfraith yr UE a ddargedwir yn gweithio'n dda. Rydym yn disgwyl gwybodaeth glir gan Lywodraeth y DU am ba ddarnau perthnasol o REUL y mae'n dymuno eu newid a fyddai'n effeithio ar y sector bwyd a diod.

*Ffermio:* • *Safonau ffermio - dywed NFU Cymru y gallai llywodraethau ganfod eu hunain mewn sefyllfa yn brwydro yn erbyn camau brysiog i gau bylchau deddfwriaethol sydd wedi agor. Yn ôl NFU, bydd senarios o'r fath yn niweidiol i hyder a sicrwydd busnes a defnyddwyr. Maent yn rhybuddio bod rhaid gwobrwyo safonau uchel o'r farchnad, neu fel arall bydd cynhyrchwyr o Gymru yn cael eu rhoi dan anfantais gystadleuol. Maent yn annog Llywodraeth Cymru i weithio gyda llywodraethau eraill i eirioli safonau uchel a gwrthsefyll ras i'r gwaelod.*

Unwaith eto, credwn fod angen i Lywodraeth y DU ymgysylltu'n llawn â'r Llywodraethau Datganoledig i ystyried yr holl faterion i ddiwydiant sy'n deillio o unrhyw newid arfaethedig mewn safonau, ac ystyried sut y gellir rheoli hyn orau o fewn y setliadau datganoli. Yn gyffredinol, credwn fod cyfraith yr UE a ddargedwir yn gweithio'n dda. Rydym yn aros am wybodaeth glir gan Lywodraeth y DU am ba ddarnau perthnasol o REUL y mae'n dymuno eu newid a fyddai'n effeithio ar ffermio.

*Lles Anifeiliaid: • Dywed RSPCA fod REUL yn cynnwys rhai o'r newidiadau mwyaf totemig a phwysig yn lles anifeiliaid ac maent yn poeni y gallai safonau fod mewn perygl. Maent hefyd yn pryderu am newidiadau neu gael gwared ar gyfreithiau a gadwyd yn ôl ar Gymru, fel gwaharddiadau ar ddefnyddio hormonau milfeddygol a gwaharddiadau ar fewnforio anifeiliaid gwyllt a chynhyrchion morloi, a'r defnydd o anifeiliaid mewn ymchwil.*

Mae gan y Bil y potensial i gael gwared ar ddarnau hanfodol o REUL sy'n sail i agweddau pwysig ar les anifeiliaid. Unwaith eto, nid yw'n hysbys beth mae Llywodraeth y DU yn bwriadu ei wneud yn ymarferol yn y maes hwn. Rydym yn rhannu pryderon yr RSPCA am y posibilrwydd o ddirymu neu wneud newidiadau i ddarnau o REUL a gadwyd yn ôl sy'n effeithio ar y meysydd hynny. Rydym wedi gofyn i Lywodraeth y DU, fel rheol gyffredinol, sicrhau ei bod yn cynnwys y Llywodraethau Datganoledig yn ei gwaith ar REUL a gadwyd yn ôl a allai effeithio ar feysydd datganoledig.

Yn gywir,



**Vaughan Gething AS/MS**  
Gweinidog yr Economi  
Minister for Economy



**Lesley Griffiths AS/MS**  
Y Gweinidog Materion Gwledig a Gogledd  
Cymru, a'r Trefnydd  
Minister for Rural Affairs and North Wales,  
and Trefnydd